

## HEEREMÄTTLI-CLIQUE

# Usverkaufs-Rummel

Stoht d'Lademamsell still und liicht verdriesslig  
Afangs vom Jänner hindrem Ladedisch,  
und isch em Chef sy Gsicht meh suur as siesslig  
Will d'Kasse leer und will halt ebe schliesslig  
Der letschti Wiehnachtsumtausch ummes-n-isch —

Denn rollt der Gschäftsma hindrem Pult verborge  
Wild syni Auge und dänggt an d'Bilanz,  
Er quält sich nächtelang, bis dief in Morge,  
Er schwimmt mit Wohlhuscht in de glainschte Sorge  
und sait sich vor: Ich zehr vo der Substanz.

«I friss mer 's Margg uss alle Bai und Gnoche,  
I spyr der Ruggritt a mym Läbeslauf.  
Es länngt mer kuum zum 's kalte Wasser koche.  
I läb doch inere luusige Epoche.  
My Rettig isch allai e groosse Usverkauf! »

Er het zwor nyt meh als so Ladehieter,  
und Ramsch wo fuul isch wie ne ibel Ai,  
Er hoggt syt Johre scho uff däne Gieter  
Und nit emol der dimmschti Baselbieter  
Riehr do ne Hand, und erscht rächt nit e Bai.

Er pryst sy Hafekäs, wo als Versager  
Syt Johr und Dag im diefe Käller hoggt  
Als unwohrschynlig maximale Schlager  
Bald als e Glanzstigg vo sym ganze Lager —  
und mit Fanfaredeen wo d'Kaifer loggt !

Das losst er denn in Farbekataloge  
Bebilderet und ziemlich hemmigslos,  
Au wenn er weiss, die scheene Bilderbooge  
Sinn prächtig zwor, doch immerhin verlooge  
In wilder Spreizig uff die Dumme los.

Jetz sottsich si renne gseh, die Dreimoolgschupfte!  
Si stirme-n-ihm der Lade wie verruggt.  
Mit Däsche, Netzli und em Leiterwage  
Griegsch Püff in d'Lände, d' Wade und in Mage.  
So wird vor jeder Ladediire druggt.

Und paarwys duet me d'Frau in Lade schleuse,  
Wie Furie stirzt me sich uff all die War,  
Wie Haifisch schnappe si in Netz und Reuse,  
Si dien mit Inbrunscht in däm Gips do neuse  
und zahle jede Ginggernillis bar.

Zwei Dutzed Schlutti! Dryzäh Aendifungge !  
Durbrochni Raizwesch (Vorkriegsqualität)  
Do und dert hänn Occasione gwungge:  
E Schachtlekäs, wo scho syt Johr usgschtungge  
und do ne Buech 'Wie lebe ich diät'.

Me kauf bedängelos der greeschti Schmätter,  
Wäg mit em Bulver, use! Furt isch furt!  
y kaufsvruggt und als e Gäldverjätter  
Stoht me, den Helden gleich, bi Wind und Wätter  
Und schnallt vo do a änger denn dr Gurt.

Bis Ultimo soll sich dr Eltscht ergetze,  
An Wurschthytt oder an Salamischnier.  
Dä bruucht sich wäg däm Kabis nit z'entsetze,  
Und isch kai Gäld meh do, denn kennt me 's Bett versetze  
Bi uns isch's jo im Kahn lengscht zimlig stier.

Und isch nit d'Hauptsach: Hindrem Pult verborge  
Fillt sich der Gschäftsma ladend 's Portmonee.  
Der Run uff d'Räschte raubt em syni Sorge,  
Es git gnueg Dummi, wo doch ums Verworge  
Im alte Mischd wänn Occasione gseh.

---

Aber gäll, am Fasnachts-Zyschdig gohsh au in  
d'Ladärne-n-Usste11ig. s'isch Offe vom Morge-n-am  
Nyni bis z' Nacht am Elfi.